

ՍԵՒԱՆԱՅ ՎԱՆՔԻ ՊԱՏՄՈՒԹԻՒՆԸ

Սեանայ վանքի նախնական պատմութիւնը միանգամայն ծածկուած է Թանձր մշուշով: Աւանդութիւնն ասում է, թէ այստեղ, բլրի զազաթին, եղել է մի մեհեան, որը կործանել է ս. Գրիգոր Լուսաւորիչը Տրդատի հետ այստեղով անցնելիս, և նրա տեղը կանգնել ս. Յարութեան տաճարը 305 թ. կղզին էլ կոչել է «Սա է վան», որ յետոյ աղաւաղուելով դարձել է Սէվան: Անուան մի այսպիսի անհեթեթ բացատրութիւն էլ տուել են ոմանք, վերլուծելով Սեան բառը «սե-վան», կամ «սե-վանք»-ի, որից և յառաջացել է ռուսական կոչումը՝ Սեվանգ (Севангъ). Ամենահաւանական ենթադրութիւնը այս անուան ծագման վերաբերութեամբ պ. Նիկողոսիւնն է, որ հանում է Օրդակուի և Քեօլանի-դանի սեպածն արձանագրութիւնների մէջ յիշատակուած «Suinia» բառից, որ վերաբերում է այս լճին և որ ուրարտերէն նշանակում է «լիճ» կամ «աւազան» *):

Վերոյիշեալ աւանդութիւնից զատ Սեանայ վանքի կամ կղզու մասին մինչև ութերորդ դարը ոչ մի յիշատակութիւն չկայ: Միայն 703 թուին Յովհաննէս կաթողիկոսի ասելով, Արարացւոց տիրապետութեան ժամանակ Մահմէտ ոստիկանը բնակւում էր ընդ բլուրից իսկ ամբողջ Հայոց դէշը, և զորս միանգամ յինքն զրաւէին, առհասարակ քանդեալ աւերեալ ի վայր կործանէին: Իսկ Սեան կղզի, որ ի ծովակին Գեղամայ, թէպէտ և յիսկզրան նուազի անդ ոչ ըմբռնեցաւ ի ձեռս նորա, սակայն զինի երկեամ մի ամաց մատնեցաւ ի ձեռս նորա. և որ միանգամ բնակեալ կային յամբողջ անդ՝ զերի առեալ տանէր, և զկապուտ կողոպուտն յաւարի առեալ՝ սպառսպուտ քանդէր աւերէր զամբողջն:

Այս պատմութիւնից երևում է, որ Սեանայ կղզին միաժամանակ իբր ամբողջ է ծառայել. և յիրաւի, նրա երեք կողմը ուղղահայեաց ժայռերով պատած լինելով միանգամայն անմատչելի են, իսկ միակ, ցածրադիր կողմը, այն է հարաւ-արեւմտեանը, պատած է եղել պարսպով, որի հիմնապատերն այժմ էլ նկատելի են լճափին:

Այս աւերածութիւնից յետոյ պատմութիւնը դարձեալ լուռ է Սեանայ կղզու և վանքի վերաբերմամբ գրեթէ երկու դար շարունակ, մինչև 874 թուականը, երբ հիմնարկուած են այժմեան կանգուն եկեղեցիները Մաշտոց վարդապետի ձեռքով և Մարիամ Թագուհու միջոցներով:

Մաշտոցը նշուարդ գիւղից է եղել, ծնուած 833—4 թուին.

*) Никольский: Клинообразные надписи Закавказья. стр. 127.

նա ուսել է Մաքրնացոց վանքում և այդ տեղի էլ միաբան դարձել, սակայն մի առ ժամանակից յետոյ դնացել է Արտաւազդայ ապարանք կոչուած ւսելի խստակրօն անապատը և այստեղից 862 թ. եկել է Սեանայ կղզու հանդէպ, լճի արեւմտեան ափին բարձրացող այժմ «Մաշտոցներ» կոչուող, սարի զաղաթին, մի բնական սառն աղբիւրի մօտ մի փոքրիկ մատուռ շինել և այդ տեղ ճգնել: Ապա անցել է Սեան կղզին, որի արեւելահայեաց ժայռերի մէջ, մի դժուար մատչելի տեղում այսօր էլ ցոյց է տրւում երկու քարայրեր, որոնցից մինում ճգնել է նա, և միւսում ապրել: Այստեղ հետզհետէ միաբանակիցներ ժողովելով, Մաշտոց տաս տարի շարունակ ճգնութեամբ և ուսուցմամբ է պարապել, այնպէս որ նրա աշակերտ Յովհաննէս կաթողիկոսի ասելով «փայլատալեալ պայծառանայր... որ զփառացն Աստուծոյ անշիջանելի ճառագայթումն յինքն նկարէր, աստուածային ծաւալմամբ և սրբափայլ կրօնիք կենդանականօք. և հոգեխաղաց տեսութեամբք ի տեսականն անդ զանտեսն տեսանէր. սակս այնորիկ ամենեցուն աչք ի նա հայէին, յաղազս տրոհել ճանաչել մարթիւրյոյ նորա զոգևորացն մասանց ընտրութիւնս ստուգագէտ»:

Ահա սա, Մտեփանոս Օրբելեանի ասելով, «հրաման առնու ի տեսլեան» շինել եկեղեցի յանուն Երկոտասան Առաքելոց, և սահմանել միաբանակեացս. յաղազս որոյ և զային առ նա Երկոտասանն ի վերայ ծովուն, յանուրջս. և նշանէին զտեղի եկեղեցւոյն: Այս միևնոյն տեսիլը տեսնում է նաև Աշոտ Ա. Թագաւորի զուտոր և Սիւնեաց Գաբուռն Վասակ իշխանի ամուսին Մարիամը, որ ամուսնու մահից յետ այս միջոցներում ճգնում էր Սեանայ կղզու հանդէպ գտնուած Յամաքարերդի կուսանաց անապատում, այս պատճառով էլ «զայ առ սուրբն Մաշտոց և բազում Թախանձանօք ի հաւան ամեալ զնա ձեռն ի գործ արկեալ շինեն զգեղապաճոյճ եկեղեցիսն յանուն սուրբ Առաքելոց և զմիւսն յանուն Տիրուհւոյ Աստուածածնին. և զարդարեալ մեծամեծ սպասուք՝ կանգնեն զնա տուն Աստուծոյ և բնակարան աստուածազգեաց արանց յՅԻԳ Թուականին Հայոց» որ է Փրկչական 874 թ.

Վանքը շատ շուտով ապահովուել է նիւթականապէս՝ Մարիամ Թաղուհու հօր՝ Աշոտ Ա. առատածնունդեամբ, որ այցելելով վանքին՝ նուիրում է «փրկական նշանն աստուածընկալ խաչին», և հետեւեալ գիւղերը՝ Վարսեր (այժմ Զըւշըւ), Յամաքարերդ, Գոմաձոր, Բերդքն, Ուռեաց տափ, Որսն Կոակըծին (այժմ Ծակքար, Դաղախում), ինչպէս և միքանի այգիներ Գառնիում, Երեւանում և այլ տեղեր *):

*) Ստ. Օրբելեան. գլ. ԼԷ:

Այս առատ նուիրարերութեան շնորհիւ Սեանայ վանքը սկսել է բարգաւաճիլ. աւելացել են միաբանները, շինուել են նորանոր խցեր, յառաջ է գնացել վանական դպրութիւնը, և սրա շնորհիւ բարձրացել է Մաշտոցի հեղինակութիւնը, այնպէս որ՝ Արաք Սպարապետը՝ ցանկանալով խել թագաւորական թագը իւր եղբորորդի Սմբատ Ա-ից, լարուել է նաև Գէորգ կաթուղիկոսի դէմ՝ համարելով նրան Սմբատի կուսակից և առաջարկել է Մաշտոցին օգնել իրեն՝ Գէորգին կաթուղիկոսութիւնից ձգելու՝ խոստանալով նրան կաթուղիկոս ընտրել տալ։ Սակայն Մաշտոց յանդիմանական և խրատական մի թղթով համոզել է նրան յետ կենալ իր չար դիտաւորութիւնից և թողութիւն խնդրել կաթուղիկոսից։ Մի շատ գեղեցիկ մխիթարական թուղթ էլ ուղղել է նա Դուինի 893 թ. սոսկալի երկրաշարժից ազատուածներին։

Այսպէս աճել է հեղինակութիւնը Մաշտոցի, որ շայն չափ տքնութեամբ հեղ էր և լաւակամ, և տեսական զուարթ և առատամիտ և ընտրող յոյժ, և վայելուչ հասակաւ մարմնոյն և մխիթարական բանիւ առ զանեալսն խորհրդով, և զօրաւոր և ահարկու առ հօրսը, այնպէս որ Գէորգ Բ. կաթուղիկոսի մահից յետոյ, 897 թուին նա ընտրուել է կաթուղիկոս։ Սակայն 7 ամսից յետոյ վախճանուել է և թաղուել Գառնիում։ Նրան յաջորդել է նրա աշակերտ Յովհաննէս Զ. Դրասխանաւերացին։ Մաշտոց բարեփոխել է Հայոց եկեղեցու ծիսարանը, որի պատճառով և այդ գիրքը այժմ էլ կոչուում է «Մաշտոց»։

Մի քանի խօսք էլ ասենք Մարիամ տիկնոջ մասին։—Այս բարեպաշտ տիկինը ճգնաւորական կեանք է վարել ինչպէս Յամաքաբերդի կուսանոցում, այնպէս և իւր կառուցած Սեանի վանքում։ Եւ որովհետև արգելուած է եղել կանանց աղօթել ճգնաւորների հետ միասին, ուստի Առաքելոց եկեղեցու հիւսիսային խորանի ներսի դռան փոխարէն միայն մի փոքրիկ բացուած էին թողել՝ ձայնը հեշտութեամբ անցնելու նպատակով։ Դրսից մի դուռ ընդունել է Մարիամ տիկնոջը խորանի մէջ, որ առանց տեսնելու ճգնաւորներին և կամ նրանցից տեսնուելու, յետեւ է ժամասացութեան։

Մի անգամ էլ, երբ Մարիամ տիկինը իւր Սահակ և Վասակ որդիներին հետ հալածուելով Յուսուփ ոստիկանից ապաստանել է այս կղզին, Յուսուփ լաստեր պատրաստելով յարձակուել է կղզու վրայ։ Մարիամ տիկինը իւր որդիներով կարողացել է փախչել Միափորի գաւառը, (Շամշաղին), սակայն Յուսուփ մտել է կղզին, կողոպտել, և ապա հետապնդել նրանց և հասել։ Սահակ և Վասակ

իշխանները ընդդիմադրել են նրան և նոյն իսկ այնպիսի ջարդ տուել, որ զորքերը հարկադրուել են փախչել:

Սիւնեացի այս իշխաններն անցել են Արցախի կողմերը, ուր 911 թուին վախճանուել է Մարիամ տիկինը, որին բերել են Գեղարքունի և թաղել նրա կառուցած Շողազայ վանքում ¹⁾:

Սակայն աւանդութիւնն ասում է՝ թէ Մարիամ տիկինը թաղուած է Սեանայ կղզում, Առաքելոց եկեղեցու վերոյիշեալ հիւսիսային խորանում, ուր գայիս էր աղօթելու:

Այս ժամարտնչի ժմրոցումս ապաստանել է նաև Աշոտ Բ. (Երկաթ) թագաւորը 923 թուին, որից ելնելով տասը նաւակով յարձակուել է Բեշիր ոստիկանի վրայ, և արագ նետաձգութեամբ փախցրել նրա զօրքը ²⁾:

Մաշտոցին յաջորդող Սեանայ վանքի վանահայրերից յայտնի է Ստեփանոս վանականը: Սա մասնակցել է այն ժողովին, որ դումարուել է Վահան կաթողիկոսին ընդդիմադրելու՝ նրա քաղքեղոնիկներին հանութեան թուղթ գրելու մտադրութեան համար: Վահան կաթողիկոսն ստիպուել է փախչել Վասպուրական՝ Ապուսաս թագաւորի մօտ, իսկ ժողովը Աշոտ Գ. Շահնշահի կամակեցութեամբ կաթողիկոս է ընտրել այս Ստեփանոս վանականին 970 թ. ³⁾, որ միայն 2 տարի կաթողիկոսութիւն անելուց յետ՝ վախճանուել է:

Սրան յաջորդել է Խաչիկ և ապա դարձեալ Սեանայ վանքի վանահայր Սարգիս ձգնակեացը, որ նախ Շողազայ վանքի վանահայրն է եղել: Սարգիս 27 տարի կաթողիկոսութիւն է արել՝ վարելով միանգամայն այնպիսի կրօնական կեանք, ինչպիսին վարել էր Սեանայ վանքում: Սրա հրամանով է Ասողիկը գրել իւր Տիեզերական պատմութիւնը: Սարգիս կաթողիկոսը 1019 թուին իւր տեղը կաթողիկոս է ձեռնադրել Պետրոս Գետադարձին, և ինքը առանձնացել Հոռոմոսի վանքում, ուր և վախճանուել է 1021 թուին:

ԺԱ. դարի առաջին կիսին Սեանայ վանքում սկսել է փայլել վանահայր՝ Սարգիս վարդապետ Իմաստասէրը, Գրիգոր Մաղիստրոսի արժանաւոր թղթակից և Բագրատունեաց թագաւորութեան բարձման ժամանակ հասած աղէտների ողբողը: Սրանից յետոյ մինչև 1205 թ. տպակասում են տեղեկութիւններ, իսկ այս ժամանակ յիշուում է Սարգիս «Սեանայ միայնակեացը» ⁴⁾, որ մաս-

¹⁾ Յովհաննէս կաթողիկոս.

²⁾ Ասողիկ Գլ. Ը.

³⁾ Անդ.

⁴⁾ Կիրակոս Գանձակեցի.

նակցել է Զաքարիա սպասաւարի առաջարկով հրաւիրուած Լօռու ժողովին Մխիթար Գոշի և ուրիշների հետ:

Հաւանականօրէն այս Սարգիս վանականի ժամանակ, ԺԳ. դարում, երբ Լեզգիները յաճախ յարձակում են գործել Հայաստանի վրայ կողոպտելու նպատակով, Սևանի շրջակայ բնակիչներն էլ ապաստանել են այս կղզում: Այս միջոցին Լեզգիների մի խումբ խորամանկութեամբ աշխատել է մտնել կղզին և կողոպտել: Սրանցից երկուսը իբր վաճառականներ համոզել են Սևանի վերակացուին, որ թոյլ տայ կղզում մի առ ժամանակ պահել իրենց 40 արկղների մէջ դարսած ապրանքը՝ մինչև որ երկիրն աւազակներից կը խաղաղի: Պատժուած աշակերտներից մինը առանձնաանլով այս արկղների մօտ՝ լսել է նրանց միջից մարդկային ձայն, և անմիջապէս իմացրել ուսուցչին: Վանականները բացել են մի արկղ և տեսել նրա մէջ երկու զինուած Լեզգի: Բանալով դաւադրութիւն՝ վանականները ժողովրդի աջակցութեամբ զլորել են արկղները լիճը՝ երգելով «Շնորհեա՛ մեզ Տէր» շարականը, կրկնելով մարգարէի խօսքը՝ «Եւ զխորհուրդն՝ զոր խորհէ՛ք՝ խափանէ՛ Տէր, զի Աստուած ընդ մեզ է»: Յետոյ այս շարականը եկեղեցական երգերի կարգն է անցել և մինչև հիմայ էլ երգւում է: Այժմ էլ աւանդաբար ցոյց է տրւում Առաքելոց եկեղեցու մօտ մի տեղ, ուր թաղուած են այս դաւադիր խմբի առաջնորդ երկու կեղծ վաճառականները ¹⁾:

Սարգիս վանականից յետոյ դարձեալ պատմական տեղեկութիւններ պահպանում են ամբողջ չորս հարիւր տարիների վերաբերմամբ: Միմիայն մի քանի արձանագրութիւնների մէջ յիշուում են մի-երկու վանահայրերի անուն, ինչպէս Առաքելոց եկեղեցու հարաւային դռան վրայ՝ Դանիէլ վարդապետ և Ներսէս եպիսկոպոս (1522—1557):

ԺԷ. դարու սկզբին, Զաւլացիների ասպատակութիւնների պատճառով, շատ վանքերի հետ Սևանայ վանքն էլ ամայի է մնացել, մինչև որ Կարապետ եպիսկոպոսը 1620 թ. վերանորոգել է նրան: Կարապետ եպիսկոպոսը սկզբում էլ միաժամի միաբան է եղել, յետոյ հալածուելով Մելիքսեդեկ կաթողիկոսից՝ հեռացել է Միւնեաց անապատը, Սարգիս եպիսկոպոսի մօտ, որի մահից յետոյ եկել Սևան և վերակազմել այստեղի միաբանութիւնը Սարգսի կազմած կանոնների համեմատ:

Սրանից յետոյ յիշուում է Մխիթար եպիսկոպոսը, որ այս,

¹⁾ Մովսէս Երզնկացի, Ինճիւնճեան, Մանուէլ վրդ. Կիւմրիշխանեցի:

Դեղաբերունիք գաւառի Դալիդարդաշ գիւղի քահանան է եղել, Սա Նե-
ղուելով գիւղի տանուտէր Մելիք Փարսադանից՝ հեռացել է Սեան,
և կրօնաւոր դարձել, Իւր առաքինի վարքի պատճառով Փիլիպպոս
կաթողիկոսից ևպիսկոպոս է ձեռնադրուել և վանահայր կարգուել,
Նա վախճանուել է 1662 թ. և ամփոփուել Առաքելոց վանքի գաւ-
թում¹⁾։

Այս Մխիթար ևպիսկոպոսի վանահայրութեան միջոցին թիֆ-
լիսեցի Զիթախեան Սուլխան, Զալև Զօրապ եղբայրները նորոգել
են Առաքելոց տաճարը 1654 թուին, իսկ յաջորդ միւս Մխիթարի
ժամանակ, 1664 թուին, ս. Աստուածածնի տաճարը։ Առաջին Մխի-
թարի ժամանակ նրա օգնական Բարսեղ վարդապետը 1660 թուի
դարնանամտին մի արեղայի, մի սարկաւազի և 3 աշխարհականի
հետ լաստի վրայ նստած կամեցել են Սեանայ սառած լճի սառուց-
ները կոտորելով ճանապարհ բաց անել դէպի ափը, սակայն սաս-
տիկ հողմ բարձրանալու պատճառով լաստը շրջուել է և խեղդել
բոլորին, բացի սարկաւազից և մի աշխարհականից։

1692 թուին Սեան է եկել Մխիթար Սեբաստացին՝ տաւն և
վեց տարեկան հասակում, կրօնաւորելու նպատակով։ Այստեղ իւր
ցաւոս աչքերին բժշկութիւն դտնելով ս. Աստուածածնից՝ անցել
գնացել և վերջիվերջոյ հիմնել է Վեհետիկի Մխիթարեան ուխտը։
Աստուածածնի այն պատկերը, որի առաջ ծնկաչոք աղօթել է
Մխիթար՝ աչքերին բժշկութիւն հայցելով՝ 1896 թ. Մկրտիչ Ա.
կաթողիկոսի հրամանով տարուել է ս. Էջմիածին և այժմ պահ-
ւում է Հայրեկեան թանգարանում։ Այս պատկերը ներկայացնում
է Տիրամօրը նստած դիւքով, տխուր և գթոտ դէմքով. մօտը Յի-
սուս՝ նստած և խաչափայտը գրկին։ Զարչարանաց միւս գործիք-
ները, և սրանց հետ երեսուն արծաթը ցրուած են նրա առաջ²⁾։

Փոխանակ այս պատկերի, Հայր Ալիշանը ի յիշատակ Մխի-
թարի տեսեան երկհարիւրակի գետեղել է իւր Սիսականում այն
պատկերի պատճէնը, որը նկարուած է Մխիթար Սեբաստացու
Սեան գաւուց 100 տարի յետոյ, ինչպէս երևում է նրա վրայի
արձանագրութիւնից. յիշատակ է Բիժանի որդի Աւաննէսին. ՌՄԾ.
թ. (=1801)։ Այս պատկերը այժմ էլ պահւում է Սեանայ վան-
քում։

Սեանայ վանքի վանահայրերի յաջորդութեան կարգը Մխի-
թար Առաջինից յետոյ դարձեալ ընդհատուում է յիշատակութիւններ
չլինելու պատճառով. մինչև 1740 թուականը, երբ վանահայր է

1) Զաքարիա սարկաւազ. Ա. Խն.

2) Փիլոյեան. Սեանայ վանքը։

հղել Մարտիրոս եպիսկոպոս Զէրքէզեանցը Մաղկունքի Շահրիզ գիւղից, որ վերանորոգել է ս. Աստուածածնի եկեղեցու օրօրոցաձև տանիքը սրբատաշ քարով, ինչպէս երևում է այդ մասին հղած նոյն եկեղեցու արևմտեան պատի վրայի արձանագրութիւնից:

Սրա յաջորդ Յովհաննէս վարդապետ Նորատուզցու ժամանակ, 1747 թուին, երբ Նադը-շահի սպանութիւնից յետոյ նրա զօրքերը զանազան խմբերով ցրուել էին Հայաստանի զանազան կողմերը ասպատակելու, մօտ տասն հազարից բաղկացած մի խումբ էլ Ազատ խանի առաջնորդութեամբ մտել է Սիւնեաց աշխարհը՝ կողոպտելու Այս միջոցներին Գեղարքունիքի բնակիչները իրենց Մելիք-Սարգիսեան և Ալլանվերդի Իւզրաշի երեւելիներով ապաստանել են Սեան կղզում: Ասպատակողները գիւղերում բնակիչներ չգտնելով մօտեցել են Սեանին յուսուարի Ծ-ին, երբ լիճը սառած լինելով կարելի էր վերայից անցնել: Հայերը նկատելով ասպատակողներին, կամեցել են հակառակ կողմից փախչել, սակայն Յովհաննէս վարդապետը՝ որ այդ ճրագալուցի երեկոյին պատարագելիս է եղել, ձեռքն է առել կոթայ ս. Նշանը և պատուիրել ժողովրդին հանդարտուել և աղօթել. ապա շտապով հաղորդել է բոլորին՝ պատրաստելով կռուի և մահուան: Այս ժամանակ ասպատակողները փողեր հնչեցնելով գէպի կղզին են արշաւել, և մինչդեռ գէնք ունեցողներն առաջ են վազել, կանանց ու երեխաների լացն ու աղաղակը երկինք է բարձրացել, և յանկարծ սառուցը կոտրատուել է և ամբողջ ասպատակող խումբը լիճը խորասուզուել, անհետացել:

Այս Յովհաննէս վարդապետի վանահայրութեան ժամանակ, 1748 թուին, երևանի խանի հրամանով Ղազար կաթողիկոսն աքսորուել է Սեան և նրա փոխարէն կաթողիկոս է ձեռնադրուել Այնթափի Գիւթար անուանուած Պետրոս եպիսկոպոսը: Սակայն յետոյ Ղազար կաթողիկոսը իւր բարեկամների միջնորդութեամբ աքսորից ազատուել է և վերոյիշեալ Պետրոսին աքսորել Զահուկ, ուր և մեռել է¹⁾:

Յովհաննէս վարդապետից յետոյ 1753 թուին վանահայր է դառել Սամուէլ վարդապետը, որ կարճ միջոցից յետոյ հրաժարուել է և նրա փոխարէն Սիմէօն կաթողիկոսի կոնդակով վանահայր է կարգուել Յովհաննէս վարդապետը, մի «ցոփաբարոյ և արըշիւ» մարդ: Սրա ժամանակ Սիմէօն կաթողիկոսը կամեցել է այցելել Սեանայ կղզին: Յովհաննէս վարդապետը տեսնելով, որ հնազոյն

¹⁾ Զամէան պատմ. Հայոց Գ. եր. 840.

մատենաներն անխնամ պահուելով փչացել են, որի համար զրասէր կաթուղիկոսից նախատուելու է, բոլոր անկազմ եղած հին գրքերը, տետրակները և յիշատակարանները հաւաքել է տուել և գիշերը լիճը ածել¹⁾։

Յովհաննէս վարդապետին յաջորդել են միքանի վարդապետներ և եպիսկոպոսներ, որոնց գործունէութեան մասին ոչինչ յայտնի չէ։

Այսպէս 1771 թ. Աթանաս վարդապետ Մակուեցի, 5 տարի Աղարիս եպիսկոպոս Գանձակեցի, միքանի ամիս։

Եղիազար եպիսկոպոս Գանձասարեցի, երեք տարի։

Գրիգոր վարդապետ Գանձակեցի, որ ութ տարի բարեկարգ իրձակի մէջ է պահել վանքը։ Սա Յամաքարեղում գերի է ընկել լեզգիների ձեռք և տարուել Ղլլար՝ ուր տեղացի հայերի ձեռքով ազատուել է և ինքը երաշխաւորելով ազատել իւր հետ գերի ընկած մի քանի ընկերներին։ Ապա Աստրախանի ու Ղլլարի կողմերում ժողովարարութիւն է արել, որ ազատուի երաշխաւորութիւնից և չորս տարուայ այսպիսի աստանդական կեանքից յետոյ վախճանուել է Ղլլար քաղաքում 1805 թ.։

1807 թ. վանահայր է կարգուել Սարգիս վարդապետ Ոսկանապոյին, որ Թիֆլիսում ժողովարարութիւն անելով, փոքր ինչ բարեկարգել է վանքի զրութիւնը։

Սրա ժամանակ վանքում նշանաւոր են եղել Ռաֆայէլ Գանձակեցին, որ կրօնաւորների վարժապետ է եղել, Մակար վարդապետ Շամշատինեցին, լաւ սաղմոսերգու, որ սառած լճի վրայով Յամաքարեղ գնալիս՝ խորասուզուել է լճի մէջ, և Մխիթար վարդապետ Շամքորեցին, որ բաւականաչափ գրքեր է հաւաքել վանքում և ընտիր մատենաներից օրինակել տուել։

Սարգսի ժամանակ վանքի միաբաններն եղել են 7 վարդապետ, 7 սարկաւազ, 3 դպիր և 4 մատեսի։

1813 թուին վանքին այցելել է Մորիէ Անգղիացին, Պարսկաստանի զննչականի ընկերը, որ իւր ուղեգրութեան մէջ տուել է նաև կղզու պատկերը։

Մի քանի տարիներից յետոյ եկել է նրա հայրենակից Բեր-Բորաբըրը, որ զանազան տեղեկութիւններ է տուել Սևանայ լճի մասին։

1825 թ. վանքը այցելել է Զաքարիա վարդապետ (ապա ե-

¹⁾ Քսաներորդ դարումն էլ Տաթևի վանահայրը քարացած ձեռագիրները կրակն է ածել վանքը մաքրելիս։

պիսկոպոս և Երևանի առաջնորդ) Գուլասպեան Բէհրութեանց Տփիսեցիին, որ գրել է Սեանայ համառոտ պատմութիւնը «Վէպ ծովակին Գեղամայ» խորագրով:

Յաջորդ 1826 թուին վանքը այցելել է Այլավալտ երկրաբան գերմանացիին:

Սարգիս վարդապետը 19 տարի վանահայրութիւն անելուց յետոյ հրաժարուել է 1828 թ. և միաբանութիւնը նրա փոխարէն ընտրել է Յովհաննէս վարդապետ Տէր-Մարտիրոսեանցին, որ Ղազարու գաւառի Հաչաջուր գիւղից է եղել: Սրա խնդրով էջմիածնի Սինոդի անդամ Մանուէլ վարդապետ Կիւմիւշխանեցին գրել է «Պատմութիւն անցից անցելոց Սէվանայ վանուց» աշխատութիւնը, քաղելով տեղեկութիւններ ինչպէս գրաւոր, այնպէս և բանաւոր աղբիւրներից և հասցնելով վանքի պատմութիւնը մինչև իւր օրերը, 1830 թուականը:

Յովհաննէս վարդապետը վերանորոգել է ս. Աստուածածնի եկեղեցու տանիքը, որի ծախքը հայթհայթելու համար Շաքիի կողմերը ժողովարարութեան համար ուղարկուած Բայազէտցի Կարապետ վարդապետն աւագակներէից սպանուել է իւր ծառայի հետ, ինչպէս վկայում է Աստուածածին եկեղեցու արևմտեան դռան աջ կողմում գտնուած արձանագրութիւնը:

Յովհաննէս վարդապետը շինել է նաև նոր խցեր, նորոգել է ս. Աստուածածին եկեղեցու գաւիթը, և մատանները կմացի Ստեպանոս վարդապետի ծախքով:

Այսքան շինութիւններ անելուց յետոյ Յովհաննէս վարդապետը հրաժարուել է առաջնորդութիւնից, գնացել Երուսաղէմ և վերադարձին Աղէքսանդրապոլում հիւանդացել և մեռել 1840 թ.:

Սրա առաջնորդութեան միջոցին, այն է երեսնական թուականներին, վանքի միաբանները եղել են 22 հոգի, որոնցից 10 վարդապետ, 2 սարկաւազ և 10 մահտեսի:

Այս միջոցներին, 1836 թուին, հայոց եկեղեցին ընդունել է Ռուսաց կառավարութիւնից Պօլոժնիսն, որ փոփոխութիւն է ձգել նաև Սեանայ վանքում: Մինչև այս՝ Գեղարքունիքի 24 գիւղերը կազմում էին Սեանայ թեմը, և Սեանայ վանքի վանահայրը միաժամանակ և՛ առաջնորդ է եղել այդ թեմի. սակայն Պօլոժնիայի զօրութեամբ Սեանայ թեմը միացել է Երևանի թեմին, և Սեանայ վանքը ընկել է Երևանի կոնսիստորիայի իրաւասութեան տակ, պարտաւորուելով տարեկան ելւմտի հաշիւ ներկայացնել նոյն ատենանին, վերադահելով իրեն միայն այն արտօնէութիւնը, որ երբ մուտքը ծախսից աւելանայ՝ ֆայ վանքի սեպհականու-

թիւն, իսկ եթէ պակասի՝ հոգևոր ատեանը մի որևէ կարգադրութիւն անէ լրացնելու¹⁾։

Այսպէս ուրիշն՝ Սեանայ վանահայրերը զրկուել են առաջնորդական թեմից ու տիրադատից և մնացել լոկ վանահայրեր՝ ընտրուելով միաբանութիւնից և հաստատուելով հոգևոր բարձրագոյն իշխանութիւնից։

Յովհաննէս վարդապետ վերջին առաջնորդից յետոյ առաջին վանահայր կարգուել է Մինաս վարդապետը, 1840 թուին, որ հազիւ մի տարի պաշտօն է վարել։ Նրան յաջորդել է 1841 թուին Յարութիւն եպիսկոպոս Դանձակեցին, իսկ մի քանի ամսից յետոյ՝ Յովհաննէս վարդապետ Անտոնեան Տփլիսեցին, որի ժամանակ Սեան է եկել Յովհաննէս եպիսկոպոս Շահաթունեան։ Սա գլխաւորապէս օգտուելով Զաքարիա վարդապետ Բէհլուքեանցի տետրակից՝ բաւական մանրամասն տեղեկութիւններ է ղեկեղել Սեանի մասին «Ստորագրութիւն կաթողիկոսէ ս. Էջմիածնի և հինգ զաւառացն Արարատայ» աշխատութեան մէջ։

Յովհաննէս վարդապետը շուտով տեղափոխուել է Կարմիր վանքը։

Սրան 1848 թ. յաջորդել է Մկրտիչ վարդապետը, որին երկուսի ժամանակ Շիրակից փախցրել էին Պարսիկ աւազակները և Երևանում ծախել վերոյիշեալ Յովհաննէս վարդապետին, որ բերել էր Սեան, կրթել և վարդապետ ձեռնադրել։ Սրա վանահայրութեան ժամանակ մի հայ զաւառապետ իւր ընտանիքով ցանկացել է այցելել Սեանայ վանքը, սակայն միաբանութիւնը թոյլ չի տուել, որովհետեւ բացի Մարիամ տիկնոջից և արշաւանքների ժամանակ Սեան ապաստանող ամբողջ ազգաբնակչութեան հետ եկած կանանցից, ոչ մի կին իրաւունք չէ ունեցել այս ճգնութեան վայրը մտնելու։ Հայ զաւառապետը վերաւորուած դիմել է Ներսէս Ե. կաթողիկոսին և նրանից թոյլտւութիւն ստանալով՝ եկել։ Միաբանները սաստիկ վրդովուել են, և նոյն իսկ Սարգիս վարդապետը, որ կին չտեսնելու նպատակով միշտ խուսափել է գիւղ մտնելու և այս պատճառով էլ «Քիանդա-գիրմազ» (Դիւղ-չմանող) կոչուել, հրացան առած զուրս է եկել արգելելու, սակայն իզուր, զաւառապետը իր կնոջ հետ մտել է կղզին և այսպիսով՝ Ներսէս կաթողիկոսի կոնդակի համեմատ՝ այս արգելքը վերացել է։

Այս Մկրտիչ վանահօր ժամանակ 1856 թ. Ներսէս Ե. կաթողիկոսը հաստատել է Սեանում ևս վանական կառավարութիւն՝

¹⁾ Սարգիս եպիսկ. Սեանայ վանքը. Հովիւ 1906 թ. № 42.

Յարութիւն, Կարապետ և Յովսէփ վարդապետներէն՝ վանահօր նախագահութեամբ և Գեղարքունի գաւառի «հոգեւոր գործոց տեսչի» (Բարսեղ աղա Արծրունու) վերահսկողութեամբ ¹⁾ սակայն այս բարեկարգութիւնը տեւել է միայն մինչև Ներսէս Ե. մահը:

Մկրտիչ վարդապետը 10 տարի վանահայրութիւն անելուց յետոյ վախճանուել է 1858 թ. և նրան յաջորդել է Կարապետ վարդապետը, Ղազարի Քարվանսարա գիւղից: Իսա աւելացրել է ուխտաւորների սենեակները Բարսեղ աղա Արծրունու ձեռնառութեամբ: Վերջինս իւր ծախքով շինել է նաև հրկու սենեակ՝ բարձրաստիճան հիւրերի համար:

Երեք տարուց յետոյ Կարապետ վարդապետը հրաժարուել է պաշտօնից և 1861 թ. նրա փոխարէն վանահայր է կարգուել Յարութիւն վարդապետ Մառշանեան Շիրակեցին: Սա շինել է վանքի մառանը, և Յամաքաբերդում նորոգել «գրքի տներ» կոչուած հիւրատունը և շտեմարանը. միևնոյն ժամանակ կղզու մէջ տնկել է ուռնիներ և բարդիներ, ու պարտէզներ շինել:

Մառշանեանի օրով թէյ գործածելու սովորութիւնը մտել է վանքը: Նախ միայն ուտիս օրերին են թէյ խմել, յետոյ ամէն օր: Այս թէյի և այլ մանր ծախսերի համար կարգադրուել է «ժամոց» բաժանել միաբաններին.— տարեկան 36 ռ. վարդապետներին, 15 ռ. սարկաւազներին, 9 ռ. դպիրներին և 6 ռ. մահտեսիներին ²⁾:

Մառշանեանի օրով, 1862 թ. մեռել է Մելքոն ճգնաւոր Տփլիսեցին, որ 40 տարի շարունակ խիստ ճգնաւորական կեանք էր վարել այս կղզում, բացել էր ս. Յարութեան եկեղեցու հիմնադրարարը և շինել բաւականաչափ խցեր:

Յարութիւն վարդապետը 9 տարի վանահայրութիւն անելուց յետոյ հրաժարուել է պաշտօնից, զնացել Երուսաղէմ, և ապա կրկին վերադարձել Սեան, ուր յողացաւից տառապել մինչև 1896 թ. երբ մեռաւ և թաղուեց ս. Աստուածածնի եկեղեցու մօտ՝ վանահայրերի հանգստարանում:

Յարութիւն վարդապետի հրաժարուելուց յետոյ կրկին վանահայր է կարգուել Կարապետ վարդապետ Բիւրիւլիանը 1869 թուին: Սա ևս գլխաւորապէս զբաղուել է շինութիւններով. նախ ծածկել է ս. Աստուածածնի տանիքը երկաթէ թիթեղով, ապա աւելացրել է ուխտաւորների սենեակները, նկենդկա գիւղի մօտ

¹⁾ Կոնդակներ Ներսէս կաթողիկոսի 1856 թ. սեպտ. № 157 և 305:

²⁾ Մարգիս Կպիսկոպոս. Սեանայ վանքը. Հովիւ 1906 թ. № 48.

շինել է երկու կարաւանատուն, Զանգի գետի վրայ նոր սիստեմի երկու ջրաղաց. մի տուն է գնել Երևանում և մի ջրաղաց Նոր-Բայազետում և վանքի վրայ հաստատել տունել Ելենովկայի մօտ նոր բացուած թերակղզին:

1871 թուին, ամառը, Գէորգ Գ. կաթուղիկոսը այցելելով Սեան կղզին, շատ հաւանել է և որոշել բլրի գագաթին հայրապետական ամարանոց կառուցանել, սակայն բժիշկների խորհրդով փոխել է որոշումը, որովհետև լճի խոնաւութիւնը կարող է վատ ազդել:

Տեսնելով միաբանութեան սաստիկ տգիտութիւնը, Գէորգ Գ. կաթուղիկոսը վերադարձին Էջմիածնից ուսուցիչներ է ուղարկել՝ ուսուցանելու միաբաններին. նախ եկել է Յովակիմ սարկաւազը, ապա եղիս վարդապետ Զալալեանը, որին յաջորդել է Յովակիմ վարդապետ Ղամէքեանը: Այս գեղեցիկ գործը տեսել է մինչև 1880 թուականը:

Բիւրիւլեանի երկարատև վանահայրութեան միջոցին 1890 թուին Իտալիայի Թադաժառանգ (այժմ Թադաուր) Վիկտոր Էմմանուէլը այցելեց Սեանայ վանքին ևս, հիանալով լճի սքանչելի տեսքից:

1892 թուին Բիւրիւլեան վանահայրը 25 տարի վանահայրութիւն անելուց յետոյ վախճանուեց և նրան յաջորդեց Գալուստ վարդապետը, որ միայն 7 ամիս պաշտօն վարելուց յետոյ հրաժարուեց: Այս ժամանակ Սինոդի հրամանով Սեան ևկաւ Սահակ վարդապետ Ամատունին, և միաբանների ընդհանուր հաւանութեամբ վանահայր ընտրեց Գրիգոր վարդապետ Ակուռեցուն, 1892 թ.: Սա ազգաւ քուրդ էր, Ակուռի կործանման ժամանակ հանդում դռնուելով՝ սարսափած փախել, աղատուել էր, ապա Դաւաշիշակի Ալափարս գիւղի տանուէրի մօտ ծառայութեան էր մտել, քրիստոնէութիւն ընդունել, յետոյ եկել Սեան, ուսում առել և 20 տարի վանքին ջերմեռանդութեամբ ծառայելուց յետոյ 1872 թ. վարդապետ ձեռնադրուել: Սա համոզեց նաև իւր հօրեղ-բօրը՝ որ քրիստոնէութիւն ընդունէ:

Սահակ Ամատունին Գիւմրիշխանցու պէս վանքի բոլոր կալուածների և իրեղէնների ցուցակը ¹⁾ և ելեմոից նախահաշիւը կազմեց և առաջարկեց Սինոդին հաստատութեան, և սա՝ վաւերացնելով ու ժապաւինելով վերադարձրեց վանքին: Այս ցուցակով վանքը ունի 112 կտոր ձեռագիր և 541 կտոր տպուած գիրք:

¹⁾ Ձեռագրների ցուցակը, առանց յիշատակարանների, տպուած է Սմբատեանի Գեղարքունիքում. եր. 128.

Գրիգոր վարդապետը երեք տարի վանահայրութիւն անելուց յետոյ 1895 թ. հրաժարուեց և նրա փոխարէն ընտրուեց Սարգիս վարդապետ, այժմ եպիսկոպոս, Փիլոյեանը:

«Կորած Մարգարիտ» վէպի հեղինակ և նոյն իսկ հերոս հեղահամայր և ուսումնասէր ներկայ վանահայրը 1897 թ. Շուշեցի Աւետիք Բալայեան Ղուկասեանի ծախքով շինեց դպրոցական մի գեղեցիկ շէնք, սրբատաշ քարից, թիթեղածածք, հինգ մեծ սենեակներից բաղկացած: Նաև Բագուում ժողովարարութիւն անելով կառուցեց միաբանների համար նոր, գեղեցիկ խցեր, 10 սենեակներից և հինգ նախասենեակներից բաղկացած՝ ընդարձակ պատշգամբով, ինչպէս նաև Բուդաղեան եղբայրների ծախսով վանահօր համար բնակարան՝ չորս սենեակներից և մի նախասենեակից բաղկացած: Բագուեցի Լիւդվիգ Մարգսեանի և վանքի միաբան հանգուցեալ Սողոմոն սարկաւազի ծախսով էլ կառուցեց ս. Աստուածածնի եկեղեցու սրբատաշ, գեղեցիկ զանգակատունը: Այժմ էլ շինում է ուխտաւորների համար 15 սենեակներից բաղկացած ընդունարան:

ՍԵՒԱՆԱՅ ՎԱՆՔԻ ՊԱՏՄԱԿԱՆ ԷՎՈԼՒԻՑԻԱՆ

Գծելով Սեանայ վանքի պատմութիւնը, որքան թոյլ են տալիս նիւթերը, տեսնում ենք, որ սա ունեցել է երեք գլխաւոր շրջան: Առաջնում (305—874) նա հին մեհեանից փոխուել է վանքի և հասանալիանօրէն առանձին հասարակական ոչ մի գեր չէ խաղացել, մանաւանդ որ ոչ մի յիշատակութիւն չկայ: Երրեմի միայն, այն էլ կղզու շնորհիւ, ժողովրդին իրր ապաստան է ծառայել, որովհետեւ իւր ժամանակի համեմատ մի բանամտչելի ամբողջ է համարուել: Այս ծառայութիւնը նա մատուցել է նաև յետագայ երկու շրջաններում:

Երկրորդ շրջանում (874—1836), երբ ճգնաւորութիւնը Հայաստանում էլ արդէն որոշ զարգացման է հասել, Մաշտոց և նրա նման ճգնաւորներ խմբուել են այս մեկուսացած, մանաւանդ ձմեռն աշխարհից կտրուած վայրը և մոռանալով հասարակական կեանքը՝ ճգնել: Ահա այս Թ. և Ժ. դարերի ոգու ազդեցութեամբ՝ շինուել են գեղեցիկ եկեղեցիներ, նուիրել ահագին կալուածքներ, կաղմակերպուել բաւական մեծ միաբանութիւն, որը տուել է նոյն իսկ կաթողիկոսներ՝ ինչպէս Մաշտոց (897 թ). Ստեփանոս վանական (970), Սարգիս ճգնակեաց (992—1019), որոնք սակայն, նշանաւոր են եղն նոյն իսկ հայրապետական աթոռի վրայ իրենց ճգնաւորական կեանքով և ոչ հասարակական գործունէութեամբ: